

摘藻堂四庫全書薈要

集部

欽定四庫全書薈要

集部

劉賓客外集卷一

三

詳校官助教呂常伯



欽定四庫全書薈要卷一萬三千八百五十五

集部

劉賓客外集卷一

唐 劉禹錫 撰

詩

翰林白二十二學士見寄詩一百篇因以答貺
始至雲安寄兵部韓侍郎中書白舍人二公近曾

遠守故有屬焉

白舍人自杭州寄新詩有柳色春藏蘇小家之句
因而戲酬兼寄浙東元相公

春日書懷寄東洛白二十二楊八二庶子

白舍人見酬拙詩因以寄謝

白舍人曹長寄新詩有遊宴之盛因以戲酬

蘇州白舍人寄新詩有歎早白無兒之句因以贈之

和汴州令狐相公到鎮改月偶書所懷二十二韻
白太守行

酬樂天揚州初逢席上見贈

同樂天登棲靈寺塔

罷郡歸洛途次山陽留辭郭中丞使君

楚州開元寺北院枸杞臨井繁茂可觀羣賢賦詩

因以繼和

和樂天鸚鵡

歲杪將發楚州呈樂天

洛中逢白監同話遊梁之樂因寄宣武令狐相公
河南王少尹宅燕張常侍白舍人兼呈盧郎中李

員外二副使

鶴歎二首

并序

有所嗟二首

答樂天臨都驛見贈

再贈樂天

和裴相公傍水閒行

和宣武令狐相公郡齋對新竹

答白刑部聞新蟬

和裴相公寄白侍郎求雙鶴

和樂天送鶴上裴相公別鶴之作

終南秋雪

闕下待傳點呈諸同舍

和樂天早寒

和樂天以鏡換酒

同樂天送河南馮尹學士

同白二十二贈王山人

題集賢閣

杏園花下詠樂天見贈

和令狐相公初歸京國賦詩言懷

曲江春望

和令狐相公春日尋花有懷白侍郎閣老

和樂天南園試小樂

和樂天春詞

和嚴給事聞唐昌觀玉蕊花下有游仙二絕

歎水別白二十二

答樂天戲贈

同樂天送令狐相公赴東都留守

自戶部尚書拜

翰林白二十二學士見寄詩一百篇因以答貺

吟君遺我百篇詩使我獨坐形神馳
玉琴清夜人不語琪樹春朝風正吹
郢人斤斲無痕跡仙人衣裳棄刀尺
世人方內欲相尋行盡四維無處覓

始至雲安寄兵部韓侍郎中書白舍人二公近曾

遠守故有屬焉

天外已子國山頭白帝城波清蜀棟盡雲散楚臺傾迅
瀨下哮吼兩岸勢爭衡陰風鬼神過暴雨蛟龍生硤斷
見孤邑江流照飛甍蠻軍擊巖鼓篠馬引雙旌望闕遙
拜舞分庭備將迎銅符一以合文墨紛來縈暮色四山
起愁猿數處聲重關羣吏散靜室寒燈明故人青霞意
飛舞集蓬瀛昔曾在池籞應知魚鳥情

白舍人自杭州寄新詩有柳色春藏蘇小家之

句因而戲酬兼寄浙東元相公

錢塘山水有奇聲暫謫仙官領百城
女妓還聞名小小使君誰許喚卿卿
鼇驚震海風雷起蜃鬪噓天樓閣成
莫道騷人在三楚文星今向斗牛明

春日書懷寄東洛白二十二楊八二庶子

曾向空門學坐禪如今萬事盡忘筌
眼前名利同春夢醉裏風情敵少年
野草芳菲紅錦地遊絲撩亂碧羅天
心知洛下閒才子不作詩魔即酒顛

白舍人見酬拙詩因以寄謝

雖陪三品散班中
資歷從來事不同
名姓也曾鐫石柱
詩篇未得上屏風
甘陵舊黨凋零盡
魏闕新知禮數崇
煙水五湖如有伴
猶應堪作釣魚翁

白舍人曹長寄新詩有遊宴之盛因以戲酬

蘇州刺史例能詩
西掖今來替左司
二八城門開道路
五千兵馬引旌旗
水通山寺笙歌去
騎過虹橋劍戟隨
若共吳王鬪百草
不如應是欠西施

蘇州白舍人寄新詩有歎早白無兒之句因以
贈之

莫嗟華髮與無兒却是人間久遠期雪裏高山頭白早
海中仙果子生遲于公必有高門慶謝守何煩曉鏡悲
幸免如新分非淺祝君長咏夢熊詩

高山之高于門使
之高二義故殊古

之詩流
曉此

和汴州令狐相公到鎮改月偶書所懷二十二韻
受脤新梁苑和羹舊傅巖援毫動星宿垂釣取韜鈴赫

奕三川至歡呼百姓瞻綠油貔虎擁青紙鳳皇銜外壘
曾無警中厨亦罷監推誠人自服去殺令逾嚴赳赳容
皆飾幡幡口盡鉗為兄憐庾翼選婿得蕭咸鬱屈咽喉
地駢臻水陸魚渡橋鳴紉憶入肆颺雲帆端月當中氣
東風應遠占管弦喧夜景燈燭掩寒蟾酒每傾三雅書
能發百函詞人羞布鼓遠客獻貂襜歌榭白團扇舞筵
金縷衫旌旗遙一簇烏履近相攬花樹當朱閣晴河逼
翠簾衣風飄爰燭淚滴巉巖玉笋虛頻易金爐暖更

添映鏤窺豔豔隔袖見纖纖謝傳何由接桓伊定不
凡應憐郡齋老旦夕鑷霜髯

白太守行

聞有白太守棄官歸舊谿蘇州十萬戶盡作嬰兒啼太
守駐行舟閭門草萋萋揮袂謝啼者依然兩眉低朱戶
非不崇我心如重狴華池非不清意在寥廓栖夸者竊
在怪賢者默思齊我為太守行題在隱起珪

訓樂天揚州初逢席上見贈

已山楚水淒涼地二十三年棄置身懷舊空吟聞遂賦
到鄉翻似爛柯人沉舟側畔千帆過病樹前頭萬木春
今日聽君歌一曲暫憑杯酒長精神

同樂天登棲靈寺塔

步步相攜不覺難九層雲外倚闌干忽然語笑半天上
無限遊人舉眼看

罷郡歸洛途次山陽留辭郭中丞使君

自到山陽不許辭高齋日夜有佳期管弦正合看書院

語笑方酬各詠詩
銀漢雪晴褰翠幕
清淮月影落金卮
洛陽歸客明朝去
容起城東花發時

楚州開元寺北院枸杞臨井繁茂可觀羣賢賦
詩因以繼和

僧房藥樹依寒井
井有香泉樹有靈
翠黛葉生籠石甃
殷紅子熟照銅瓶
枝繁本是仙人杖
根老新成瑞犬形
上品功能甘露味
還知一勺可延齡

和樂天鸚鵡

養來鸚鵡背初紅宜在朱樓繡戶中頻學喚人緣性慧
偏能識主為情通斂毛睡足難銷日彈翅愁時願見風
誰遣聰明好顏色事須安置入深籠

歲杪將發楚州呈樂天

楚澤雪初霽楚城春欲歸清淮變寒色遠樹含清暉原
野已多思風霜潛減威與君同旅鴈北向刷毛衣

洛中逢白監同話遊梁之樂因寄宣武令狐相

公

曾經謝病各遊梁今日相逢憶孝王
少有一身兼將相更能四面占文章
開顏坐內催飛盞迴首庭中看舞槍
借問風前兼月下不知何客對胡床

河南王少尹宅燕張常侍白舍人兼呈盧郎中
李員外二副使

將星夜落使星來三省清臣到外臺
事重各銜天子詔禮成同把故人盃
捲簾松竹雪初霽滿院池塘春欲迴
第一林亭迎好客殷勤莫惜玉山頽

金史卷一百一十五
鶴歎二首

并序

友人白樂天去年罷吳郡挈雙鶴雛以歸余相遇
于揚子津間翫終日翔舞調態一符相書信華亭
之尤物也今年春樂天為祕書監不以鶴隨置之
洛陽第一旦予入門問訊其家人鶴軒然來睨如
記相識徘徊俛仰似含情顧慕填膺而不能言者
因作鶴歎以贈樂天

寂寞一雙鶴主人在西京故巢吳苑樹深院洛陽城徐

引竹間步遠含雲外情誰憐好風月鄰舍夜吹笙

東鄰即王

家

丹頂宜承日霜翎不染泥愛池能久立看月未成棲一
院春草長三山歸路迷主人朝謁早貪養汝南雞

有所嗟二首

庾令樓中初見時武昌春柳似腰肢相逢相笑盡如夢
為雨為雲今不知

鄂渚濛濛烟雨微女郎魂逐暮雲歸只應長在漢陽渡

化作鴛鴦一隻飛

答樂天臨都驛見贈

北固山邊波浪東
都城裏風塵世事不同
心事新人何似故人

再贈樂天

一政政官軋軋一年年
老駸駸身外名何足算
別來詩且同吟

和裴相公傍水閒行

為愛逍遙第一篇時時閒步賞風煙看花臨水心無事
功業成來二十年

和宣武令狐相公郡齋對新竹

新竹脩脩韻曉風隔窓依砌尚蒙籠數間素壁初開後
一段清光入座中欹枕閒看知自適含毫朗咏與誰同
此君若欲長相見政事堂東有舊叢

答白刑部聞新蟬

蟬聲未發前已自感流年一入淒涼耳如聞斷續絃晴

清依露葉晚急畏霞天何事秋卿咏逢時一悄然

和裴相公寄白侍郎求雙鶴

皎皎華亭鶴來隨太守船

白君罷吳郡太守攜雙鶴來

青雲意長在

滄海別經年留滯清洛苑裴回明月天何如鳳池上雙
舞入祥烟

和樂天送鶴上裴相公別鶴之作

昨日看成送鶴詩高籠提出白雲司朱門乍入應迷路
玉樹容棲莫揀枝雙舞庭中花落處數聲池上月明時

三山碧海不歸去且向人間呈羽儀

終南秋雪

南嶺見秋雪千門生早寒閒時乘馬望高處卷簾看霧
散瓊枝出日斜鉛粉殘偏宜曲江上倒影入清瀾

闕下待傳點呈諸同舍

禁漏晨鐘聲欲絕旌旗組綬影相交殿含佳氣當龍首
閣倚晴天見鳳巢山色蔥蘢丹檻外霞光泛艷翠松梢
多慚再入金門籍不敢為文學解嘲

和樂天早寒

雨引苔侵壁風驅葉擁堦久留閒客話宿請老僧齋酒
甕新陳接書籤次第排翛然自有處搖落不傷懷

和樂天以鏡換酒

把取菱花百鍊鏡換他竹葉十旬杯頰眉厭老終難去
蘸甲須歡便到來妍醜太分迷忌諱松喬俱傲絕嫌猜
校量功力相千萬好去從空白玉臺

同樂天送河南馮尹學士

可憐玉馬風流地暫輟金貂侍從才閣上掩書劉向去
門前脩刺孔融來峭陵路靜寒無雨洛水橋長晝起雷
共羨府中棠棣好先於城外百花開

同白二十二贈王山人

愛名之世忘名客多事之時無事身古老相傳見來久
歲年雖變貌常新飛章上達三清路受錄平交五嶽神
笑聽鑿鑿朝暮鼓只能催得市朝人

題集賢閣

鳳池西畔圖書府玉樹玲瓏景氣閒長聽餘風送天樂
時登高閣望人寰青山雲繞欄干外紫殿香來步武間
曾是先賢翔集地每看壁記一慙顏

杏園花下訓樂天見贈

二十餘年作逐臣歸來還見曲江春遊人莫笑白頭醉
老醉花間有幾人

和令狐相公初歸京國賦詩言懷

凌雲羽翮挾天才揚歷中樞與外臺相印昔辭東閣去

將星還拱北辰來
殿庭捧日彩纓入
閣道看山曳履迴
口不言功心自適
吟詩釀酒待花開

曲江春望

鳳城烟雨歇萬象
含佳氣酒後人倒
狂花時天似醉三
春車馬客一代繁
華地何事獨傷懷
少年曾得意

和令狐相公春日尋花有懷白侍郎閣老

芳菲滿雍州鸞鳳
許同遊花逕須深
入時光不少留色
鮮由樹嫩枝亞為
房稠靜對仍持酒
高看特上樓晴宜

連夜賞雨便一年休共憶秋官處餘霞曲水頭

和樂天南園試小樂

閒步南園烟雨晴遙聞絲竹出牆聲欲拋丹筆三川去
先教清商一部成花木手栽偏有興歌詞自作別生情
多才遇景皆能咏當日人傳滿鳳城

和樂天春詞

新粧宜面下朱樓深鎖春光一院愁行到中庭數花朵
蜻蜓飛上玉搔頭

和嚴給事聞唐昌觀玉蕊花下有游仙二絕

玉女來看玉蕊花
異香先引七香車
攀枝弄雪時迴顧
驚怪人間日易斜

雪蕊瓊絲滿院春
衣輕步步不生塵
君平簾下徒相問
長伴吹簫別有人

歎水別白二十二

水至清盡美從一勺
至千里利物時行時止
道性淨皆然
交情淡如此
君遊金谷堤上
我在石渠署裏兩

心相憶似波潺湲日無窮已

答樂天戲贈

才子聲名白侍郎風流雖老尚難當詩情逸似陶彭澤
齋日多如周太常矻矻將心求淨法時時偷眼看春光
知君技癢思歡譙欲倩天魔破道場

同樂天送令狐相公赴東都留守

自戶部尚書拜

尚書劔履出明光居守旌旗赴洛陽世上功名兼將相
人間聲價是文章衙門曉闕分天仗賓幕初開辟省郎

從發坡頭向東望春風處處有甘棠

自華陵至河南皆故林也

劉賓客外集卷一

欽定四庫全書薈要卷一萬三千八百五十六

集部

劉賓客外集卷二

唐 劉禹錫 撰

詩

同樂天和微之深春二十首

同用家花
車斜四韻

刑部白侍郎謝病長告改賓客分司以詩贈別
遙賀白賓客分司初到洛中戲呈馮尹

和留守令狐相公答白賓客

始聞蟬有懷白賓客去歲白有聞蟬見寄詩云祗

應催我老兼遣報君知之句

憶樂天

樂天寄洛下新詩兼喜微之欲到因以抒懷也
月夜憶樂天兼寄微之

酬鄆州令狐相公官舍言懷見寄兼呈樂天
吟白樂天哭崔兒二篇愴然寄贈

答樂天所寄咏懷且釋其枯樹之歎

白侍郎大尹自河南寄示池北新葺水齋即事招

賓十四韻兼命同作

赴蘇州酬別樂天

贈樂天

福先寺雪中酬別樂天

醉答樂天

和樂天耳順吟兼寄敦詩

到郡未浹日登西樓見樂天題詩因即事以寄

樂天

自此郡謝

病西歸

早夏郡中書事

虎丘寺見元相公二年前題名愴然有詠

前年滄橋送之

武昌

寄贈小樊

憶春草

樂天寄憶舊遊因作報白君以答

和白侍郎送令狐相公鎮太原

秋夕不寐寄樂天

冬日晨興寄樂天

酬樂天見寄

答樂天見憶

和樂天誚失婢勝者

樂天寄重和晚達冬青一篇因成再答

河南白尹有喜崔賓客歸洛兼見懷長句因而繼
和

和楊師皋給事傷小姬英英

和樂天洛下醉吟寄太原令狐相公兼見懷長句
郡齋書懷寄江南白尹兼簡分司崔賓客

訓樂天七月一日夜即事見寄

題于家公主舊宅

吟樂天自問愴然有作

八月十五日夜半雲開然後翫月因書一時之景
兼呈樂天

秋日書懷寄白賓客

訓樂天見貽賀金紫之什

訓樂天初冬早寒見寄

樂天見示傷微之敦詩晦叔三君子皆有深分因
成是詩以寄

春池泛舟聯句

杏園聯句

花下醉中聯句

宴興慶池亭送白二十二東歸聯句

西池送白二十二東歸兼寄令狐相公聯句

首夏猶清和聯句

薔薇花聯句

西池洛泉聯句

和樂天柘枝

和樂天題真娘墓

同樂天和微之深春二十首

同用家花
車斜四韻

何處深春好春深萬乘家宮門皆映柳輦路盡穿花池

色連天漢城形象帝車旌旗暖風裏獵獵向西斜
何處深春好春深阿母家瑤池長不夜珠樹正開花
峻通星渚樓暄近日車層城十二闕相對日西斜
何處深春好春深執政家恩光貪捧日貴重不看花
玉饌堂交印沙隄柱礙車多門一已閉直道更無斜

何處深春好春深大鎮家前旌光照日後騎蹙成花
節院收衙隊毬場簇看車廣筵歌舞散書號夕陽斜

何處深春好春深貴戚家
榼嘶無價馬庭發有名花
欲

進宮人食先薰命婦車晚歸長帶酒冠蓋甚傾斜

何處深春好春深思澤家爐添龍腦炷綬結虎頭花賓

客珠成履嬰孩錦縛車畫堂簾幕外來去燕飛斜

何處深春好春深京兆家人眉新柳葉馬色醉桃花盜

息無鳴鼓朝迴自走車能令帝城外不敢逕由斜

何處深春好春深刺史家夜闌猶命樂雨甚亦尋花傲

客多憑酒新姬苦上車公門吏散後風擺戟衣斜

何處深春好春深羽客家芝田繞舍色杏樹滿山花雲

是淮王宅風為列子車古壇操簡處一逕入林斜

何處深春好春深小隱家
芟庭留野菜撼樹去狂花
醉酒一千日貯書三十車
推衾從露體不敢有餘斜

何處深春好春深富室家
唯多貯金帛不擬負鶯花
國樂呼聯轡行厨載滿車
歸來看理曲燈下寶釵斜

何處深春好春深豪士家
多沽味濃酒貴買色深花
已臂鷹隨馬連催妓上車
城南踏青處村落逐原斜

何處深春好春深貴胄家
迎呼偏熟客揀選最多花
飲

饌開華幄笙歌出鈿車興酣罇易罄連瀉酒瓶斜

何處深春好春深唱第家名傳一紙榜興管九衢花薦
聽諸侯樂來隨計吏車杏園拋曲處揮袖向風斜

何處深春好春深少婦家能偷新禁曲自剪入時花追
逐同遊伴平章貴價車從來不墮馬故遣髻鬟斜

何處深春好春深幼女家雙鬟梳頂髻兩面繡裙花粧
壞頻臨鏡身輕不占車鞦韆爭次第牽拽綵繩斜

何處深春好春深蘭若家當香收百葉養蜜近梨花野

逕宜行藥遊人盡駐車
菜園籬落短遙見桔槔斜

何處深春好春深老宿家
小欄圍蕙草高架引藤花
四字香書印三乘壁畫車
遲迴聽勾偈雙樹晚陰斜

何處深春好春深種蒔家
分畦十字水接樹兩般花
櫛比栽籬槿咿啞轉井車
可憐高處望綦布不曾斜

何處深春好春深稚子家
爭騎一竿竹偷折四鄰花
笑擊羊皮鼓行牽犢領車
中庭貪夜戲不覺玉繩斜

刑部白侍郎謝病長告改賓客分司以詩贈別

鼎食華軒到眼前拂衣高坐豈徒然九霄路上辭朝客
四皓叢中作少年他日卧龍終得雨今朝放鶴且冲天
洛陽舊有衡茆在亦擬抽身伴地仙

遙賀白賓客分司初到洛中戲呈馮尹

西辭望苑去東占洛陽才度嶺無歸思看山不悞來冥
鴻何所慕遼鶴乍飛迴洗竹通新逕攜琴上舊臺塵埃
長者轍風月故人杯聞道龍門峻還因上客開

和留守令狐相公答白賓客

麥隴和風吹樹枝
商山逸客出闕時
身無拘束起長晚
路足交親行自遲
官拂象筵終日待
私將雞黍幾人期
君來不用飛書報
萬戶先從紙貴知

始聞蟬有懷白賓客去歲白有聞蟬見寄詩云
祇應催我老兼遣報君知之句

蟬韻極清切
始聞何處悲
人含不平意
景值欲秋時
此歲方晚晚
誰家無別離
君言催我老
已是去年詩

憶樂天

尋常相見意殷勤別後思量夢更頻每遇登臨好風景
羨他天性少人情

樂天寄洛下新詩兼喜微之欲到因以抒懷也
松間風未起萬葉不自吟池上月未來清輝同夕陰宮
徵不獨運塤塡自相尋一從別樂天詩思日已沉吟君
洛中作精絕百鍊金乃知孤鶴情月露為知音微之從
東來威鳳鳴歸林羨君先相見一豁平生心

月夜憶樂天兼寄微之

今宵帝城月一望雪相似遙想洛陽城清光正如此知
君當此夕亦望鏡湖水展轉相憶心月明千萬里

酬鄆州令狐相公官舍言懷見寄兼呈樂天

詞人各在一涯居聲味雖同跡自疎佳句傳音多好事
尺題稀鴈不便書已通戎略逢黃石仍占星文耀碧虛
聞說朝天在來歲霸陵春色待來車

吟白樂天哭崔兒二篇愴然寄贈

吟君苦調我霑纓能使無情盡有情四望車中心未擇

千秋亭下賦初成庭梧已有棲雛處池鶴今無子和聲
從此期君比瓊樹一枝吹折一枝生

答樂天所寄咏懷且釋其枯樹之歎

衙前有樂饌常精宅內連池酒任傾自是官高無狎客
不論年長少歡情驪龍頷被探珠去老胖胚還應月生
莫羨三春桃與李桂花成實向秋榮

白侍郎大尹自河南寄示池北新葺水齋即事
招賓十四韻兼命同作

公府有高政新齋池上開再吟佳句後一似畫圖來結
構疎林下寅緣曲岸隈綠波穿戶牖碧甃疊瓊瓌幽異
當軒滿清光繞砌迴潭心澄晚鏡渠口起晴雷瑤草緣
堤種松煙上島栽遊魚驚撥刺浴鷺喜毳毼為客烹林
笋因僧採石苔酒斝常不罄書案任成堆簷外青雀舫
坐中鸚鵡杯蒲根抽九節蓮萼捧重臺芳訊此時到勝
遊何日陪共譏吳太守自占洛陽才

赴蘇州酬別樂天

吳郡魚書下紫宸
長安廐吏送朱輪
二南風化承遺愛
八咏聲名躡後塵
梁氏夫妻為寄客
陸家兄弟是州民
江城春日追隨處
共憶東歸舊主人

贈樂天

一別舊遊盡相逢
俱涕零在人雖晚
達於樹似冬青
痛飲連宵醉狂吟
滿坐聽終期拋印
綬共占少微星

福先寺雪中酬別樂天

龍門賓客會龍宮
東去旌旗駐上東
二八笙歌雲幕下

三千世界雪花中
離堂未暗排紅燭
別曲含淒颺曉風
才子從今一分散
便將詩咏向吳儂

醉答樂天

洛城洛城何日歸
故人故人今轉稀
莫嗟雪裏暫時別
終擬雲間相逐飛

和樂天耳順吟兼寄敦詩

吟君新什慰蹉跎
屈指同登耳順科
鄧禹功成三紀事
孔融書就八年多
已經將相誰能爾
拋却丞郎爭奈何

獨恨長洲數千里且隨魚鳥泛烟波

到郡未浹日登西樓見樂天題詩因即事以寄

樂天自此郡
謝病西歸

湖上收宿雨城中無晝塵樓依新柳貴池帶亂苔春雲
水正一望簿書來繞身烟波洞庭路愧彼扁舟人

早夏郡中書事

水禽渡殘月飛雨灑高城華堂對嘉樹簾廡含曉清拂
鏡整危冠振衣步前楹將吏儼成列簿書紛來縈言下

辨曲直筆端破交爭虛懷詢病苦懷律操剽輕闕吏告
無事歸來解簪纓高簾覆朱閣忽坐聞調笙

虎丘寺見元相公二年前題名愴然有詠

前年
渡橋

送之
武昌

漉水送君君不還見君題字虎丘山因知早貴兼才子
不得多時在世間

寄贈小樊

花面了頭十三四春來綽約向人時終須買取名春草

處處將來步步隨

憶春草

春草樂天
舞妓名

憶春草處處多情洛陽道金谷園中見日遲銅駝陌上
迎風早河南大尹頻出難只得池塘十步看府門閉後
滿街月幾處遊人草頭歇館娃宮外姑蘇臺鬱鬱芊芊
撥不開無風自偃君知否西子裙裾曾拂來

樂天寄憶舊遊因作報白君以答

報白君別來已渡江南春江南春色何處好燕子雙飛

故官道春城三百七十橋夾岸朱樓隔柳條
頭小兒蕩畫槳長袂女郎簪翠翹
郡齋北軒卷羅幕碧池逶迤
遶畫閣池邊綠竹桃李花花下舞筵鋪彩霞
吳娃足情言語黠越客有酒巾冠斜坐中皆言白
太守不負風光向杯酒酒酣襍飛逸韻至今傳在
人人人口報白君相思空望嵩丘雲其奈錢塘蘇
小小憶君淚點石榴裙白君有妓近自洛歸錢塘

和白侍郎送令狐相公鎮太原

十萬天兵貂錦衣晉城風日斗生輝行臺僕射深思重
從事中郎舊路歸疊鼓聲成汾水浪閃旗驚斷塞鴻飛
邊庭自此無烽火擁節還來坐翠微

秋夕不寐寄樂天

洞戶夜簾卷華堂秋簟清螢飛過池影蛩思遶階聲老
枕知將雨高窓報欲明何人諳此景遠問白先生

冬日晨興寄樂天

庭樹曉禽動郡樓殘點聲燈挑紅燼落酒暖白光生髮

少嫌梳利顏衰恨鏡明獨吟誰應和須寄洛陽城

酬樂天見寄

元君後輩先零落崔相同年不少留華屋坐來能幾日

夜臺歸去便千秋背時猶自居三品

三川吳郎品同

得老終須

一丘

投老之日願樂天為鄰

若使吾徒還早達亦應簫鼓入松

楸

答樂天見憶

興老無期約到來如等閒偏傷朋友盡移興子孫間筆

底心無毒盃前膽不豚

呼闕反

唯遺憶君夢飛過武牢關

和樂天誚失婢謗者

把鏡朝猶在添香夜不歸
鴛鴦拂瓦去鸚鵡透籠飛
不逐張公子即隨劉武威
新知正相樂從此脫青衣

樂天寄重和晚達冬青一篇因成再答

風雲變化饒年少光景蹉跎屬老夫
秋隼得時凌汗漫寒龜飲氣受泥塗
東隅有失誰能免北叟之言豈便無
振臂猶堪一呼擲爭知掌下不成盧

河南白尹有喜崔賓客歸洛兼見懷長句因而
繼和

幾年侍從作名臣却向青雲索得身朝士忽為方外士
主人仍是眼中人雙鸞遊處天京好五馬行時海嶠春
遙羨光陰不虛擲肯令絲竹暫生塵

和楊師皋給事傷小姬英英

見學胡琴見藝成今朝追想幾傷情撚絃花下呈新曲
放撥燈前謝改名但是好花皆易落從來尤物不長生

驚臺夜直衣衾冷雲雨無因入禁城

和樂天洛下醉吟寄太原令狐相公兼見懷長

句

舊相臨戎非稱意詞人作尹本多情從容自使邊塵靜
談笑不聞桴鼓聲章句新添塞下曲風流舊占洛陽城
昨來亦有吳趨詠惟寄東都與北京

郡齋書懷寄江南白尹兼簡分司崔賓客

謾讀圖書三十車年年為郡老天涯一生不得文章力

百口空為飽煖家
綺季衣冠稱鬢面
吳公政事副詞華
還思謝病今歸去
同醉城東桃李花

酬樂天七月一日夜即事見寄

夜樹風韻清
天河雲彩輕
故苑多露草
隔城聞鶴鳴
搖落從此始
別離含遠情
聞君當是夕
倚瑟吟商聲
外物豈不足
中懷向誰傾
秋來念歸去
同聽高陽笙

題于家公主舊宅

樹滿荒臺葉滿池
簫聲一絕草蟲悲
鄰家猶學宮人髻

園客爭偷御菓枝
馬埒蓬蒿藏狡兔
鳳樓烟雨嘯愁鴟
何郎獨在無恩澤
不似當初傅粉時

吟樂天自問愴然有作

親友關心皆不見
風光滿眼倍傷神
洛陽城裏多池館
幾處花開有主人

八月十五日夜半雲開然後翫月因書一時之
景兼呈樂天

半夜碧雲收中天
素月流開城邀好
客置酒賞新秋影

透衣香潤光凝歌黛愁斜輝猶可翫移宴上西樓

秋日書懷寄白賓客

州遠雄無益年高健亦衰興情逢酒在筋力上樓知蟬
噪芳意盡鴈來愁望時商山紫芝客應不向愁悲

訓樂天見貽賀金紫之什

久學文章含白鳳却因政事賜金魚郡人未識聞謠詠
天子知名與詔書珍重和詩呈錦繡願言歸計並園廬
舊來詞客多無位金紫同遊誰得如

訓樂天初冬早寒見寄

乍起衣猶冷微吟帽半欹
霜凝南屋瓦雞唱後園枝
洛水碧雲曉吳宮黃葉時
兩傳千里意書札不如詩

樂天見示傷微之敦詩晦叔三君子皆有深分
因成是詩以寄

吟君歎逝雙絕句使我傷懷奏短歌
世上空驚故人少
集中惟覺祭文多
芳林新葉催陳葉
流水前波讓後波
萬古到今同此恨
聞琴淚盡欲如何

春池泛舟聯句

鳳池新雨後池上好風光

上相公禹錫

取酒愁春盡留賓喜

日長

度送兵部

柳絲迎畫舸水鏡寫雕梁

羣送賈園長

潭洞迷仙

府烟霞認醉鄉

籍送張司業

鶯聲隨雨語行色入壺觴

籍送主客

晚景含澄澈時芳得艷陽

尚卿

飛鳧拂輕浪綠柳暗回

塘

度

逸韻追安石高居勝辟疆

羣

杯停新令舉詩動彩

牋忙

餽

顧謂同來客歡遊不可忘

杏園聯句

杏園千樹欲隨風一醉同人此暫同

醉上司空

老態忽忘絲

管裏衰顏宜解酒杯中

絳上白二十二

曲江日暮殘紅在翰苑

年深舊事空

居易上主客

二十四年流落者故人相引到花

叢

禹錫

花下醉中聯句

共醉風光地花飛落酒杯

絳送二

殘春猶可賞晚景莫

相催

禹錫送白侍郎

酒幸年年有花應歲歲開

居易送兵部相公

且當

金韻擲莫遣玉山頽

絳送庾閤長

高會彌堪惜良時不易倍

承宜送
主客

誰能拉花住爭換得春回

禹錫送吏部

我輩尋常有

佳人早晚來

嗣復送兵部

寄言三相府欲散且裴回

居易時戶部相

會公同

宴興慶池亭送白二十二東歸聯句

東洛言歸去西園告別來白頭青眼客池上手中杯度

離瑟殷勤奏仙舟委曲回征輪今欲動賓閣為誰開禹

錫坐弄瑠璃水行登綠縵苔花低粧炤影萍散酒吹醅

居易岸蔭新抽竹亭香欲變梅隨遊多笑傲過勝且排

徊籍澄澈連天鏡潺湲出地雷林塘難共賞鞍馬莫相

催度信及魚還樂機忘鳥不猜晚晴槐起露新暑石添

苔禹錫擬作雲泥別尤思頃刻陪歌停珠貫斷飲罷玉

峯顏居易雖有逍遙志其如磊落才會當重日用此去

肯悠哉籍

西池送白二十二東歸兼寄令狐相公聯句

促坐宴回塘送君歸洛陽彼都留上宰為我說中腸度

威鳳池邊別冥鴻天際翔披雲見居守望日拜封章禹

錫
春盡年華少舟通景氣長送行歡共惜寄遠意難忘

籍
東道瞻軒蓋西園醉羽觴謝公深眷眄商皓信輝光

行武
舊德推三友新篇代八行

籍

首夏猶清和聯句

記得謝家詩清和即此時

居易

餘花數種在密葉幾重

垂度
芳謝人人惜陰成處處宜

禹錫

水萍爭點綴梁燕

共追隨

行武

亂蝶憐疎蕊殘鶯戀好枝

籍

草香殊未歇

雲勢漸多奇

居易

單服初寧體新篁已出籬

度

與春為

別近覺日轉行遲禹錫遶樹風光少侵階苔蘚滋行武

惟思奉歡樂長得在西池籍

薔薇花聯句

似錦如霞色連春接夏開禹錫波紅分影入風好帶香

來度得地依東閣當階奉上台行武淺深皆有態次第

暗相催禹錫滿地愁英落緣堤惜棹迴度芳濃濡雨露

明麗隔塵埃行武似著燕脂染如經巧婦裁居易奈花

無別計只有酒殘杯籍

西池洛泉聯句

東閣聽泉落能令野興多

行武

散時猶帶沫淙處即跳

波度徧洗磷磷石還驚泛泛鶩

籍

色清塵不染光白月

相和居易噴雪縈絲竹攢珠濺芰荷

禹錫

對吟時合響

觸樹更搖柯

籍

照圃紅分藥侵階綠浸莎

居易

日斜車

馬散餘韻逐鳴珂

禹錫

和樂天柘枝

柘枝本出楚王家玉面添嬌舞態奢
鬆鬢改梳鸞鳳髻

金史四庫全書
卷二
新衫別織鬪雞紗鼓催殘拍腰身軟汗透羅衣雨點花
畫席曲殘辭別去便隨王母上烟霞

和樂天題真娘墓

蒼筍林中黃土堆羅襦繡黛已成灰芳魂雖死人不怕
蔓草逢春花自開幡蓋向風疑舞袖鏡燈臨曉似粧臺
吳王嬌女墳相近一片行雲應往來

劉賓客外集卷二

欽定四庫全書薈要卷一萬三千八百五十七

集部

劉賓客外集卷三

唐 劉禹錫 撰

詩

客有話汴州新政書事寄令狐相公

和令狐相公郡齋對紫薇花

令狐相公見示河中楊少尹贈答兼命繼之

和令狐相公謝太原李侍中寄蒲桃

和令狐相公送趙常盈鍊師與中貴人同拜嶽及

天台投龍畢却赴京師

令狐相公俯贈篇章斐然仰謝

酬令狐相公贈別

酬令狐相公寄賀遷拜之什

酬令狐相公早秋見寄

和令狐相公翫白菊

夏日寄宣武令狐相公

令狐相公見示贈竹二十韻仍命繼和

和令狐相公入潼關

和令狐相公尋白閣老見留小飲因贈

酬令狐相公雪中遊玄都見憶

和令狐相公以司空裴相見招南亭看雪四韻

和令狐相公別牡丹

酬令狐留守巡內至集賢院見寄

和鄆州令狐相公春晚對花

酬令狐相公春日言懷見寄

和令狐相公言懷寄河中楊少尹

遙和令狐相公坐中聞思帝鄉有感

酬令狐相公見寄

途次大梁雪中奉天平令狐相公書問兼示新什
因思曩歲從此拜辭形於短篇以申仰謝

令狐相公自天平移鎮太原以詩申賀

相公昔為
并州從事

重酬前寄

酬令狐相公秋懷見寄

酬令狐相公六言見寄

令狐相公自太原累示新詩因以酬寄

酬太原令狐相公見寄

酬令狐相公歲暮遠懷見寄

酬令狐相公親仁郭家花下即事見寄

酬令狐相公首夏閒居書懷見寄

酬令狐相公庭前白菊花謝偶書所懷見寄

酬令狐相公季冬南郊宿齋見寄

貞元中侍郎舅氏牧華州時余再忝科第前後由
華覲謁陪登伏毒寺屢焉亦曾賦詩題於梁棟今
典馮翊暇日登樓南望三峰浩然生思追想昔年
之事因成篇題舊寺

酬令狐相公杏園花下飲有懷見寄

和令狐相公春早朝回鹽鐵使院中作

令狐相公見示題洋州崔侍郎宅雙木瓜花頃接
侍郎同舍陪宴樹下吟翫來什輒成和章

和令狐僕射相公題龍回寺

和令狐相公晚泛漢江書懷寄洋州崔侍郎閬州高舍人二曹長

酬令狐相公使宅別齋初栽桂樹見懷之作

令狐相公頻示新什早春南望遐想漢中因抒短章以寄情悵

酬令狐相公見寄

令狐相公春思見寄

令狐相公見示新栽蕙蘭二草之什兼命同作

和令狐相公南齋小讌聽阮咸

和令狐相公詠梔子花

酬令狐相公新蟬見寄

和令狐相公九日對黃白二菊花見懷

城內花園頗曾遊
既令君居守亦有素期
適春霜

一夕委謝書實以答
令狐相公見謔

令狐僕射與余投分素深
縱山川阻峭然音問相

繼今年十一月僕射疾不起聞予已承訃書寢門
長慟後日有使者兩輩持書并詩計其日時已是
卧疾手筆盈幅翰墨尚新詞一篇音韻彌切收淚
握管以成報章雖廣陵之絃於今絕矣而蓋泉之
感猶庶乎聞焉焚之總帳之前以附于舊編之末
云

客有話汴州新政書事寄令狐相公

天下咽喉今大寧軍城喜氣徹青冥庭前劒戟朝迎日

筆底文章夜應星三省壁中題姓字萬人頭上見儀形
汴州忽復承平事正月看燈戶不扃

和令狐相公郡齋對紫薇花

明麗碧天霞丰茸紫綬花香聞荀令宅艷入孝王家幾
歲自榮樂高情方歎嗟有人移上苑猶是占年華

令狐相公見示河中楊少尹贈答兼命繼之

兩首新詩百字餘朱絃玉磬韻難如漢家丞相重徵後
梁苑仁風一變初四面諸侯瞻節制八方通貨溢河渠

自從却穀為元帥大將歸來盡把書

和令狐相公謝太原李侍中寄蒲桃

珍果出西域移根到北方昔年隨漢使今日寄梁王上
相芳緘至行臺綺席張魚鱗含宿潤馬乳帶殘霜染指
鉛粉膩滿喉甘露香醞成十日酒味敵五雲漿咀嚼停
金盞稱嗟響畫堂慚非末至客不得一枝嘗

和令狐相公送趙常盈鍊師與中貴人同拜嶽
及天台投龍畢却赴京師

銀璫謁者引蜺旌霞帔仙官到赤城白鶴迎來天樂動
金龍擲下海神驚元君伏奏歸中禁武帝親齋禮上清
何士夷門請詩送梁王文字上聲名

令狐相公俯贈篇章斐然仰謝

鄂渚臨流別梁園衝雪來旅愁隨凍釋歡意待花開城
曉烏頻起池春鴈欲回飲和心自醉何必管絃催

酬令狐相公贈別

越聲長苦有誰聞老向湘山與楚雲海嶠新辭永嘉守

夷門重見信陵君
田園松菊今迷路
霄漢鴛鴻久絕羣
幸遇甘泉尚詞賦
不知何客薦雄文

酬令狐相公寄賀遷拜之什

邇迴二紀重為郎
洛下遙分列宿光
不見當關呼早起

曾無侍吏與焚香
三花秀色通瑤幌
十字春波遶宅牆

白首青衫誰比數
相憐只是有梁王

相公昔曾以大僚
分司故有同病相

憐之
句

酬令狐相公早秋見寄

公來第四秋樂國號無愁軍士遊書肆商人占酒樓熊
羆交黑稍賓客滿青油今日文章主梁王不姓劉

和令狐相公翫白菊

家家菊盡黃梁國獨如霜瑩靜真琪樹分明對玉堂仙
人披雪氎素女不紅粧粉蝶來難見麻衣拂更香向風
搖羽扇含露滴瓊漿高艷遮銀井繁枝覆象床桂叢慚
竝發梅蕊妒先芳一入瑤華詠從茲播樂章

夏日寄宣武令狐相公

長憶梁王逸興多西園花盡興如何近來溽暑侵亭館
應覺清談勝綺羅境入篇章高韻發風穿號令衆心和
承明欲謁先相報願拂朝衣逐曉珂

令狐相公見示贈竹二十韻仍命繼和

高人必愛竹寄興良有以峻節可臨戎虚心宜得士衆
芳信妍媚威鳳難棲止遂於鼙鼓間移植東南美封以
梁國土澆之浚泉水得地色不移凌空勢方起新青排
故葉餘粉籠疎理猶復隔牆藩何因出塵滓茲辰去前

蔽永日勞瞪視械械林已成熒熒玉相似規摹起心匠
洗滌在頤指曲直既瞭然孤高何卓爾垂梢覆內屏迸
笋侵前庀妓席拂雲鬢賓階縻珠履抱琴恣閒翫執卷
堪斜倚露下懸明璫風來韻清徵堅貞貫四候標格殊
百卉歲晚當自知繁華豈云比古詩無贈竹高唱從此
始一聽清瑤音崢然長在耳

和令狐相公入潼關

寒光照旌節闕路曉無塵吏謁前丞相山迎舊主人東

瞻軍府靜西望勅書頻心共黃河水同昇天漢津

和令狐相公尋白閣老見留小飲因贈

傲士更逢酒樂天仍對花文章管星厯情興占年華官
達翻思退名高却不誇惟存浩然氣相共賞烟霞

酬令狐相公雪中遊玄都見憶

好雪動高情心期在玉京人披鶴氅出馬踏象筵行照
耀樓臺變淋漓松桂清玄都留五字使入步虛聲

和令狐相公以司空裴相見招南亭看雪四韻

重門不下關樞務有餘閒上客同看雪高亭盡見山瑞
呈霄漢外興入笑言間知是平陽會人人帶酒還

和令狐相公別牡丹

平章宅裏一欄花臨到開時不在家莫道兩京非遠別
春明門外即天涯

酬令狐留守巡內至集賢院見寄

仙院文房隔舊宮當時盛事盡成空墨池半在頽垣下
書帶猶生蔓草中巡內因經九重苑裁詩又繼二南風

為兄手寫殷勤句遍歷三台各一通

和鄆州令狐相公春晚對花

朱門退公後高興對花枝
望闕無窮思看書欲盡時
合芳朝競發凝艷晚相宜人
意殷勤惜狂風豈得知

酬令狐相公春日言懷見寄

前陪看花處鄰里近王昌
今想臨戎地旌旗出汶陽
營飛柳絮雪門耀戟枝霜
東望清河水心隨扁上郎

和令狐相公言懷寄河中楊少尹

章句慙非第一流世間才子昔陪遊吳宮已歎芙蓉死

張司業詩云吳宮四面秋
江水天清露白芙蓉死

邊月空悲蘆管秋

李尚書

任向

洛陽稱傲吏

分司白
賓客

苦教河上領諸侯

天平
相公

石渠甘對

圖書老關外楊公安穩不

遙和令狐相公坐中聞思帝鄉有感

當初造曲者為誰說得思鄉戀闕時滄海西頭舊丞相
停杯處分不須吹

酬令狐相公見寄

羣玉山頭住四年每聞笙鶴看諸仙何時得把浮丘袖
白日將昇第九天

途次大梁雪中奉天平令狐相公書問兼示新
什因思曩歲從此拜辭形於短篇以申仰謝

遠守宦情薄故人書信來共曾花下別今獨雪中回紙
尾得新什眉頭還暫開此時同鴈鶩池上一徘徊

令狐相公自天平移鎮太原以詩申賀

相公昔為并州

從事

北都留守將天兵出入香街宿禁扃
鼙鼓夜聞驚朔鴈
旌旗曉動拂參星
孔璋舊檄家家有
叔度新歌處處聽
夷落遙知真漢相
爭來屈膝看儀形

重酬前寄

邊烽寂寂盡收兵
宮樹蒼蒼靜掩扃
戎羯歸心如內地
天狼無角比凡星
新成麗句開緘後
便入清歌滿坐聽
吳苑晉祠遙望處
可憐南北太相形

酬令狐相公秋懷見寄

寂寞蟬聲靜差池燕羽回秋風憐越絕朔氣想臺駘相
去數千里無因同一杯殷勤望飛鴈新自塞垣來

酬令狐相公六言見寄

已嗟離別太遠更被光陰苦催吳苑燕辭人去汾川鴈
帶書來愁吟月落猶望憶夢天明未回今日便令歌者
唱兄詩送一杯

令狐相公自太原累示新詩因以酬寄

飛蓬卷盡塞雲寒戰馬閒嘶漢地寬萬里胡天無警急

一籠烽火報平安燈前妓樂留賓燕雪後山河出獵看
珍重新詩遠相寄風情不似四登壇

酬太原令狐相公見寄

書信來天外瓊瑤滿匣中衣冠南渡遠旌節北門雄鶴
唳華亭月馬嘶榆塞風山川幾千里惟有兩心同

酬令狐相公歲暮遠懷見寄

依韻

別侶孤鶴怨冲天威鳳歸容光一以間夢想是耶非芳
訊還珍重知音老更稀不如湖上鴈北向整毛衣

酬令狐相公親仁郭家花下即事見寄

荀令園林好山公遊賞頻
豈無花下侶遠望眼中人
斜日漸移影落英紛委塵
一吟相思曲惆悵江南春

酬令狐相公首夏閒居書懷見寄

蕙草芳未歇綠槐陰已成
金壘唯獨酌瑤瑟有離聲
翔泳各殊勢篇章空寄情
應憐三十載未變使君名

貞元中自

郎官出守至
今三十一年

酬令狐相公庭前白菊花謝偶書所懷見寄

數叢如雪色一旦冒霜開寒蕊差池落清香斷續來思
深含別怨芳謝惜年催千里難同賞看看又早梅

酬令狐相公季冬南郊宿齋見寄

壇下雪初霽南城凍欲生齋心祠上帝高步領名卿沐
浴含芳澤周旋聽佩聲猶憐廣平守寂寞竟何成

貞元中侍郎舅氏牧華州時余再忝科第前後
由華覲謁陪登伏毒寺屢焉亦曾賦詩題於梁
棟今典馮翊暇日登樓南望三峰浩然生思追

想昔年之事因成篇題舊寺

曾作關中客頻經伏毒巖晴烟沙苑樹晚日渭川帆昔
是青春貌今悲白雪髯郡樓空一望含意卷高簾

酬令狐相公杏園花下飲有懷見寄

年年曲江望花發即經過未飲心先醉臨風思倍多三
春看又盡兩地欲如何日望長安道空成勞者歌

酬令和相公春早朝回鹽鐵使院中作

柳動御溝清威遲堤上行城隅日未過山色雨初晴鶯

避傳呼起花臨府署明簿書盈几案要自有高情

令狐相公見示題洋州崔侍郎宅雙木瓜花頃
接待郎同舍陪宴樹下吟翫來什輒成和章

金牛蜀路遠玉樹帝城春榮耀生華館逢迎欠主人簾
前疑小雪牆外麗行塵來去皆回首情深是德鄰

和令狐僕射相公題龍回寺

茲地回鑾日皇家禪聖時路無胡馬跡人識漢官儀天
子旌旗度法王龍象隨知懷去家歎經此益遲遲

相公
家本

咸陽有喬木之思

和令狐相公晚泛漢江書懷寄洋州崔侍郎閬州高舍人二曹長

雨過遠山出江澄暮霞生因浮濟川舟遂作適野行郊
樹映緹騎水禽避紅旌田夫捐畚鍤織婦窺柴荆古岸
夏花發遙林晚蟬清沿洄方翫境鼓角已登城部內有
良牧望中寄深情臨觴念佳期泛瑟動離聲寂寞一病
士夙昔接羣英多謝謫仙侶幾時還玉京

酬令狐相公使宅別齋初栽桂樹見懷之作

清淮南岸家山樹黑水東邊第一栽影近畫梁迎曉日
香隨綠酒入金杯根留本土依江潤葉起寒稜映月開
早晚陰成比梧竹九霄還放綵鵬來

令狐相公頻示新什早春南望遐想漢中因抒
短章以寄情悵

軍城臨漢水旌旆起春風遠思見江草歸心看塞鴻野
花沿古道新葉映行宮惟有詩兼酒朝朝兩不同

酬令狐相公見寄

才兼文武播雄名，遺愛芳塵滿洛城。
身在行臺為僕射，書來內里訪先生。
閒遊占得高山色，醉卧高聽洛水聲。
千里相思難命駕，七言詩裏寄深情。

令狐相公春思見寄

一紙書封四句詩，芳晨對酒遠相思。
長吟盡日西南望，猶及殘春花落時。

令狐相公見示新栽蕙蘭二草之什，兼命同作。

上國庭前草移來漢水潯朱門雖易地玉樹有餘陰豔
彩凝還泛清香絕復尋光華童子佩柔軟美人心惜晚
含遠思賞幽空獨吟寄言知音者一奏風中琴

和令狐相公南齋小讌聽阮咸

陋巷久蕪沉四絃有遺音雅聲發蘭室遠思含竹林座
絕衆賓語庭移芳樹陰飛觴助真氣寂聽無流心影似
白團扇調諧朱絃琴一毫不平意幽怨古猶今

和令狐相公詠梔子花

蜀國花已盡越桃今已開
色疑瓊樹倚香似玉京來
且賞同心處那憂別葉催
佳人如擬詠何必待寒梅

酬今狐相公新蟬見寄

春去三十里聞蟬同此時
清吟曉露葉愁噪夕陽枝
忽爾絃斷絕俄聞管參差
洛橋碧雲晚西望佳人期

和今狐相公九日對黃白二菊花見懷

素萼迎寒秀金英帶露香
繁華照旄鉞榮盛對銀黃
琮璧交輝映衣裳雜彩章
晴雲遙蓋覆秋蝶近悠揚
空想

逢九日何由陪一觴滿叢佳色在未肯委嚴霜

城內花園頗曾遊翫令君居守亦有素期適春
霜一夕委謝書實以答令狐相公見謔

樓下芳園最占春年年結侶採花頻繁霜一夜相撩冶
不似佳人似老人

令狐僕射與余投分素深縱山川阻峭然音問
相繼今年十一月僕射疾不起聞予已承訃書
寢門長慟後日有使者兩輩持書并詩計其日

時已是卧疾手筆盈幅翰墨尚新詞一篇音韻
彌切收淚握管以成報章雖廣陵之絃於今絕
矣而蓋泉之感猶庶乎聞焉焚之總帳之前以
附于舊編之末云

前日寢門慟至今悲有餘已嗟萬化盡方見八行書滿
紙傳相憶裁詩怨索居危絃音有絕哀玉韻由虛忽歎
幽明異俄驚歲月除文章雖不朽精魄竟焉如零淚霑
青簡傷心見素車淒涼從此後無復望雙魚

劉賓客外集卷三

謹案卷一第五頁前二行暫謫仙官領百城原本
領訛有今據全唐詩改

第六頁後八行衣風飄駿韃四句原本脫今據全
唐詩增

卷二第一頁後七行且釋其枯樹之嘆原本釋訛
適今改

第二頁後八行秋夕不寐寄樂天原本夕訛冬今
改

第九頁後四行宅內連池酒任傾原本任訛甚今

改


第九頁後五行驪龍頷被探珠去原本頷訛含今

改

第十四頁後六行秋隼得時凌汗漫原本得時訛
自能據全唐詩改

卷三第八頁後一行規摹起心匠原本規訛親今

據全唐詩改



總校官庶吉士臣侍朝

校對官庶吉士臣陳崇本

謄錄監生臣宣葆光